

嚴陵集



23336

嚴

陵

集

董
棻
編

中
華
書
局

23394

叢書集成初編

嚴陵集

中華書局出版發行

(北京王府井大街三十六號)

秦皇島市資料印刷廠印刷

一九八五年北京新一版

開本：七八七乘一〇九二毫米三十二分之一

統一書號：一七〇一八·一五一

嚴陵集

此據漸西村舍叢
刊本排印初編各
叢書僅有此本

嚴陵集序

詩三百篇大抵多本其土風而有作。聖人刪取各繫其國。如二南皆正風也。周召既分陝而治。則繫詩有不得而同。三國當變風之始。邠鄘既并於衛。邠居衛北。而詩有北門。以興出門而北歸於邠也。鄘居衛東。而詩有載馳。以興東徙渡河而廬於漕也。衛在河之北。而詩有河廣。以興杭輦而南適於宋也。是三者皆衛詩。而以土風之異。隨其國繫之。其它蓋可類見。使夫後世觀詩者。因土風而知國俗。則秦勇幽怨。鄭淫魏褊。皆自乎此而得之矣。近代有哀類一州。古今文章鉉次以傳者。其亦得聖人之遺意與。自東漢之末。孫氏據有吳粵之墟。始分歙縣之地。建爲新安郡。逮隋而更郡名。新定大業。改爲睦州。唐初。卽桐廬縣別置嚴州。尋廢州。以縣來隸。至國朝宣和中。始復今名。蓋以子陵釣臺爲是邦重。故以名州。州境山水清絕。著稱自古。歷攷前代朱太守。以文學備應對之臣於西京。後世則有皇甫持正。方雄飛。李德新。施肩吾。徐凝。咸以詞章名世。文爲世傳。而記詠其鄉里爲多。今代如江民表。全名直節。見推於時。文采蓋其餘事。至於騷人名士過焉而賦者。在晉則謝康樂。梁則沈隱侯。唐則李太白。孟浩然。白樂天。羅隱。國朝則梅聖俞。蘇子美。龐莊敏公。王文公。其牧守之有文。在梁則任彥昇。唐則杜紫微。國朝則范文正公。趙清獻公。以至呂子進。蔡天啓。又如張伯玉。錢穆父。皆嘗官於此者。率多賦詠。邦人傳誦。迨今不絕。而猶未有哀類而爲集者。雖有桐江集。止載桐廬一邑之文。而又繁冗不倫。人不甚傳。茲者茲與僚屬。脩是州圖經。搜訪境內

斷碑。碑版及脫遺簡編。稽攷訂正。既成書矣。因得逸文甚多。復得郡人喻君彥先。悉家所藏書。討閱相示。又屬州學教授洪君傑。與諸生廣求備錄。時以見遺。乃爲整比而詳擇。凡自隋以上在新安郡者。自唐以後。迄國朝宣和以前。在睦州者。取之。其未嘗至而賦詠實及此土。如唐韓文公。近世司馬溫公。蘇東坡。黃魯直。蓋不得不錄也。其有名非甚顯。嘗過而賦焉。一篇一詠。膾炙人口者。蓋亦不得不遺也。嗚呼。其亦庶幾詩人本其土風之作。而聖人各繫其國之遺意乎。乃若釣臺雙峙。高風絕企。古今歌詩銘記居多。編之此集。有不容略。故總以州名而爲之標目云。紹興九年夏四月壬申。知軍州事廣川董棻序。

嚴陵集

提要

謹案嚴陵集九卷。宋董棻輯。棻，東平人。道之子也。自著曰廣川。蓋欲附仲舒裔耳。紹興間，知嚴州，因輯嚴州詩文。自謝靈運沈約以下，迄於南宋之初，前五卷皆詩，第六卷詩後附賦二篇，七卷至九卷，則皆碑銘題記等雜文。棻自序謂嘗與僚屬條是州圖經，蒐求碑版，稽考載籍，所得逸文甚多，又得郡人喻彥先家所藏書，與教授沈懷廣求備錄而成是集。中如司馬光獨樂園釣魚菴詩，本作於洛中，以首句用嚴子陵事，因牽而入於此集，未免假借附會。沿地志之陋習，然所錄詩文，唐以前人雖尙多習見，至於宋人著作，自有專集者數人外，他如曹輔、呂希純、陳瓘、朱彥、江公望、江公著、蔡肇、張伯玉、錢勰、李昉、扈蒙、劉昌言、丁謂、范師道、張保讎、章岷、阮逸、關詠、李師中、龐籍、孫沔、王存、馮京、刁約、元絳、張景修、岑象求、邵元、馬存、陳軒、吳可幾、葉棻、恭、劉涇、賈青、王達、張綬、余闢、刁衍、倪天隱、周邦彥、羅汝楫、詹元宗、陳公亮、錢聞詩諸人，今有不知其名者。有知名而不見其集者。藉棻是編，尙存梗概，是亦談藝者所取資矣。惟棻序作於紹興九年，而第九卷中有錢聞詩、凌西湖記作於淳熙十六年，上距紹興九年，凡五十一年，又有陳公亮重修嚴先生祠堂記，及書瑞蒙圖二篇，作於淳熙乙巳，市修貢院記一篇，作於淳熙丙午，亦上距棻作序之時，凡四十七八年，則後人又有所附益已，非棻之本書，要宋人所續也。

嚴陵集卷一

詩

宋 董 棻 編

七里瀨

謝靈運

羈心積秋晨。晨積展遊眺。孤客傷逝湍。徒旅苦奔峭。石淺水潺湲。日落山照燭。荒林紛沃若。哀禽相叫嘯。遭物悼遷斥。存期得要妙。既乘上皇心。豈屑末代諂。目覩嚴子瀨。想屬任公釣。誰謂古今殊。異世可同調。

新安江水至清淺深且底貽京邑遊好

沈約

眷言舫舟客。茲川信可珍。洞澈隨深淺。皎鏡無冬春。千仞寫喬樹。百丈見游鱗。滄浪有時濁。清濟涸無津。豈若乘斯去。俯映石磷磷。紛吾隔囂滓。寧假濯衣巾。願以潺湲水。沾君纓上塵。

嚴陵瀨

羣峯此峻極。參差百重嶂。清淺既漣漪。激石復奔壯。神物徒有造。終然莫能仗。

贈郭桐廬出溪口見候余既未至郭仍進邨維舟久之郭生方至

朝發富春渚。蓄意忍相思。涿令行春反。冠蓋溢川坻。望久方來萃。悲懽不自持。滄江路窮此。瀾險方自茲。疊嶂易成響。重以夜援悲。客心幸自弭。中道遇心期。親好自斯絕。孤遊從此辭。

清溪二首

此詠宛溪非天目流徑桐廬之清溪也編此殆誤李供奉足迹亦未至吾郡也鈍椎識

李白

清溪清我心。水色異諸水。借問新安江。見底何如此。人行明鏡中。鳥度屏風裏。向晚猩猩啼。空悲遠遊子。清溪勝桐廬。水木有佳色。山貌日高古。石容天傾側。綵鳥昔未名。白猿初相識。不見同懷人。對之空歎息。

經七里灘

孟浩然

予奉垂堂誠。千金非所輕。爲多山水樂。頻作泛舟行。五岳追尙子。三湘弔屈平。湖經洞庭闊。江入新安清。復聞嚴陵瀨。乃在此川路。湍嶂數百里。沿洄非一趣。彩翠相氤氲。別流亂奔注。釣磯平可坐。苔磴滑難步。援飲石下潭。鳥還日邊樹。觀奇恨來晚。倚櫂惜將暮。揮手弄潺湲。從茲洗塵慮。

至七里灘作

李嘉祐

遷客投于越。臨江淚滿衣。獨隨流水遠。轉覺故人稀。萬木迎秋序。千峯駐晚暉。行舟猶未已。惆悵莫潮歸。入睦州分水路憶劉長卿

北闕忝明主。南方隨白雲。沿洄灘草色。應接海鷗羣。建德潮已盡。新安江又分。回看嚴子瀨。朗詠謝安文。雨過莫山碧。猿吟秋日曛。吳洲不可到。刷鬢爲思君。

送張十八歸桐廬

劉長卿

歸人乘野艇。帶月過江邨。正落寒潮水。相隨夜到門。

卻歸睦州至七里灘下作

南歸猶謫官。獨上子陵灘。江樹臨洲晚。沙禽對水寒。山開斜照在。石淺亂流難。惆悵梅花發。年年此路看。
對酒寄嚴維

陋巷喜陽和。衰顏對酒歌。懶從華髮亂。閒任白雲多。郡簡容垂釣。家貧學弄梭。門葺七里瀨。早晚子陵過。
睦州送□尊師離畢還越

吹簫江上晚。惆悵別茅君。踢火能飛雪。一作登吞。刀入吐。一作白雲。晨香永日在。夜磬滿山聞。揮手桐溪路。無情水亦分。

按覆後貶官赴睦州奉贈苗侍郎制使

地遠心難達。時危謗易成。羊腸留覆轍。虎口脫餘生。直氏偷金柱。于家決獄明。一言知己重。片義殺生輕。
一作日月。下人誰憶。天涯客獨行。年光銷蹇步。秋氣入衰情。一作建業禪。知何在。長江問去程。孤舟百口淚。萬里一猿聲。落日看鄉路。空山向郡城。豈令冤積氣。千古在長平。

新安江送陸澧歸江陰

新安路人來去。蚤潮復晚潮。明日知何處。潮水無情亦解歸。自憐長在新安住。

訓皇甫侍御見寄時葺相國姑臧公初臨郡

離別江南北。汀洲葉再黃。路遙雲共水。砧過月如霜。歲儉依仁政。年來憶故鄉。佇君宣室召。漢法倚張綱。
訓張履雪夜發桐廬訪別途中苦寒之作

扁舟乘興客，不憚苦寒行。晚莫相依分，江湖欲別情。水聲冰下咽，砂路雪中平。舊劍鋒鋦盡，應嫌脫贈輕。

余浦橋月下重遊

秋風颯颯鳴條，風月相和寂寥。黃葉一離一別，青山莫莫朝朝。空江漸出亭岸，老樹猶依斷橋。明日行人已遠，空餘淚滴回潮。

七里灘重送嚴維

秋風渺渺水空波，越客孤舟欲榜歌。手折衰楊悲老別，故人零落已無多。

赴新安贈別渠侍御

新安君莫問，此路水雲深。江海無行跡，孤舟何處尋。青山空向淚，白日豈知心。縱有餘生在，終傷老病侵。

酬李穆見寄

孤舟相訪至天涯，萬轉雲山路更賒。欲埽柴門迎遠客，青苔黃葉滿貧家。

新安江奉送穆諡德歸朝賦得行字

九重宣室召，萬里建溪行。事直皇天在，歸遲白髮生。用才身復起，覩聖眼猶明。離別寒江上，潺湲若有情。

題元錄事開元寺所居

幽居蘿薜情，高臥絕綱行。鳥散秋鷹下，人閒春草生。昌嵐歸野寺，收印出山城。今日新安郡，因君水更清。

送張栩扶侍之睦州

遙憶新安舊。扁舟復卻還。淺深看水石。來往逐雲山。入縣餘花在。過門故柳閒。東征隨子去。皆隱薛蘿間。

奉使新安自桐廬縣經嚴陵釣臺宿七里灘下寄使院諸公

悠然釣臺下。懷古時一望。江水自潺湲。行人獨惆悵。新安從此始。桂楫方蕩漾。回轉百里間。青山千萬狀。連崖去不斷。對嶺遙相向。夾岸黛秋色。沈沈綠波上。夕陽留古木。水鳥拂寒浪。月下扣舷聲。煙中采菱倡。猶憐負羈束。未暇依清曠。牽役徒自勞。近名非取向。何時故山裏。卻醉松花釀。回首惟白雲。孤舟誰復訪。

嚴陵釣臺送李康成赴江東使

潺湲子陵瀨。彷彿如在目。七里人已非。千年水空漲。

新安江上孤颿遠。應逐楓林萬餘轉。古臺落日自蕭條。寒水無波更清淺。臺上魚竿不復持。卻令猿鳥向人悲。灘聲山翠至今在。遲爾行船晚泊時。

使還七里灘下逢薛承規赴江南貶

遷客歸人醉晚寒。孤舟暫泊子陵灘。憐君更去三千里。落日青山江上看。

重別嚴維

月色今宵最明。庭閒夜久天清。愁寂多年左宦。殷勤遠別深情。溪臨脩竹煙色。風落高梧雨聲。耿耿相看

不寐。遙聞曉杵山城。新安非欲掛瓢過。海內如君有幾多。醉裏別時秋水色。老人南望一狂歌。

寄劉員外

皇甫曾

南憶新安郡。千山帶夕陽。斷猿知夜久。秋草助江長。鬢髮應成素。青松獨見霜。愛才稱漢主。題柱待田郎。

發桐廬先寄劉八丈員外

李穆

處處雲山無盡時。桐廬南望轉參差。舟人莫道新安近。欲上潺湲行自遲。

耶溪書懷寄劉長卿員外寓睦州

秦系

時人多笑樂幽棲。晚起閒行獨杖藜。雲色卷舒前後嶺。藥苗新舊兩三畦。偶逢野果將呼子。屢折金釵亦爲妻。擬共釣竿常往復。嚴陵灘上勝耶溪。

寄皇甫湜

韓愈

敲門驚晝睡。問報睦州吏。手把一封書。上有皇甫字。拆書放牀頭。涕與淚垂四。昏昏還就枕。罔罔夢相值。悲哉無奇術。安得生兩翅。

送皇甫湜赴舉

馬異

馬蹄聲特特。去入天子國。借問去是誰。秀才皇甫湜。含吐一腹文。八音兼五色。主文有崔李。郁郁爲朝德。青銅鏡必明。朱絲繩必直。稱意太平年。願子長相憶。

贈施肩吾

張籍

世間漸覺無多事。雖得空名未著身。合取藥成相待喫。不須先作上天人。

送施肩吾東歸

知君本是煙霞客，被薦因來城闕間。世業偏臨七里瀨，仙游多在四明山。蚤聞詩價傳人徧，新得科名到處開。惆悵瀟湘相送去，雲中琪樹不同攀。

西山卽事奉寄故園徐處士

僕作江西少施氏，君爲城北老徐翁。詩篇憶昔歡相接，顏貌如今恨不同。世界盡憂蔬上露，時人皆怕燭前風。唯余獨慕神仙道，芥子雖窮壽不窮。

桐廬廳觀論事宴

擾擾廳前非羸瘵，中有老人扶杖拜。天公霹靂耳不聞，猶爲子孫爭地界。秋日桐江送裴秀才歸淮南。

怪來頻起詠刀頭，桐樹枝邊一葉秋。又向江南別才子，卻將風景過揚州。題釣臺蘭若。

山僧不釣臺下魚，幾年空寄臺邊坐。有時手把乾松枝，沿江乞得沙上火。歸分水留贈王少府。

仙吏飲冰多玉聲，新詩麗句遣狂生。不愁日暮歸山去，故把隋珠入夜行。過桐廬場鄭判官。

榮陽鄭君游說餘。偶因樵茗來桐廬。幽奇山水引高步。曉煜風光隨夜車。算緡百萬日不虛。吏人叢裏唯簿書。眼前橫掣斷犀劍。心中暗轉靈蛇珠。有時退公兼退食。一尊長在朱軒側。胡商大鼻左右趨。趙妾細眉前後直。醉來引客上紅樓。面前一道桐溪流。登臨山色在掌內。指點霞光隨杖頭。東郭野人慵櫛沐。使將破履升華屋。數杯醕酎不得歸。樓中便蓋江雲宿。卻被江郎濕我衣。賴君借我貂襜歸。

夏日過從叔幽居

且將一葉繫垂楊。門對清溪夏日長。林下喜逢青竹卷。局邊輸卻紫羅囊。碧蹄駿馬御芻細。紅粉佳人絮檣香。伯仲歷官年盡少。那知不笑漢馮唐。

贈族叔處士

我家名士已無求。若見翔鴻便舉頭。紫石巖邊吟繡段。青苔紙上落銀鉤。高人酒席稱無醉。細字經書讀未休。定是仙山足靈藥。年過八十轉風流。

游安禪寺

徐疑

欲到安禪游聖概。先觀湧塔出香城。樓臺有日連雲漢。壑谷無年斷水聲。倚竹並肩青玉立。上橋如蹋白虹行。傷嗟置寺碑交碎。不見梁朝施主名。

新安道中

杜牧

無端偶效張文綰。下杜鄉園別五秋。重過江南更千里。萬山深處一孤舟。

睦州四韻

州在釣臺邊。溪山實可憐。有家皆掩映。無處不潺湲。好樹鳴幽鳥。晴樓入野煙。殘春杜陵客。中酒落花前。

題新安八竹院小石

雨滴珠璣碎。苔生紫翠重。故關何日到。且看小山峯。

寄內兄和州崔員外十二韻

歷陽崔太守。何日不含情。恩義同鍾李。埧饒實弟兄。光塵能混合。璧畫最分明。臺閣仁賢譽。閨門孝友聲。西方像教毀。南海繡衣行。金臺寧回顧。珠簾肯一根。祇宜裁密詔。何自取專城。進退無非道。回翔必有名。好風初婉娈。離思苦縈盈。金馬舊游貴。桐廬春水生。雨侵寒牖夢。梅引凍醪傾。共祝中興主。高歌倡太平。

丹水

何事苦縈迴。離腸不自裁。恨聲隨夢去。春態逐雲來。沈定藍光澈。喧盤粉浪開。翠巖三百尺。誰作子陵臺。

郡中有懷寄上睦州員外十三兄歙州刺史邢羣

城枕溪流淺更斜。麗譙連帶邑人家。經冬野菜青青色。未臘山梅樹樹花。雖免瘴雲生嶺上。永無京信到天涯。如今歲宴從羈滯。心喜彈冠事不賒。

正初奉酬

翠巖千尺倚溪斜。曾得嚴光作釣家。越嶂遠分丁字水。臘梅遲見二年花。明時刀尺君須用。幽處田園我

有涯。一壑風煙陽羨里。解龜休去路非賒。

秋晚蚤發新定

解印書千軸。重陽酒百缸。涼風滿紅樹。曉月下秋江。巖壑會歸去。塵埃終不降。懸纓未敢濯。嚴瀨碧淙淙。

除官歸京睦州雨霽

秋半吳天霽。清凝萬里光。水聲侵笑語。嵐翠撲衣裳。遠樹凝羅帳。孤雲認粉囊。溪山侵兩越。時節到重陽。顧我能甘賤。無由得自強。誤會公觸尾。不敢夜循牆。豈意籠飛鳥。還歸錦帳郎。網今開傳變。書舊識黃香。姹女真虛語。飢兒欲一行。淺深須揭厲。休更學張綱。

夜泊桐廬先寄蘇臺盧郎中

水檻桐廬館。歸舟繫石根。笛吹孤戍月。犬吠隔溪村。十載遼清範。幽懷未一論。蘇臺菊花節。何處與開尊。

嚴陵釣臺下作

權德輿

絕頂聲蒼翠。清湍石磷磷。先生晦其中。天子不得臣。心靈棲顓元。歸冕猶緇塵。不樂禁中臥。卻歸江上春。潛驅東漢風。日使薄者醇。焉用佐天下。持此報故人。則知大賢心。不獨私其身。弛張有深致。耕釣陶天真。奈何清風後。擾擾論屈伸。交情同市道。利欲相紛綸。我行訪遺臺。仰古懷逸民。矧歟鴻鵠遠。雪霜松桂新。江沈去不窮。山色陵秋旻。人世自今古。清輝照無垠。

宿桐廬館同崔存度醉後作

白居易